



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

***Komunikadu Imprensa***

***Distritu Manatuto***

***11 Janeiru 2015***

**JSMP fo treinamentu ba estudante eskola sekundariu St. Antonio Manatuto: Lideransa eskola apresia JSMP nia prezensa**

Iha 09 Janeiru 2015, Judicial System Monitoring Programme ( JSMP ) liuhosi Unidade Relasaun Públiku no Unidade Justisa ba Feto no Labarik, hala'o atividade treinamentu iha Eskola Sekundariu St. Antonio Manatuto.

Iha treinamentu ne'e, JSMP apresenta materia kona-ba direitu umanu, kna'ar no kompetensia autor no instituisaun judisiáriu sira, tipu krime no sira nia natureza krime ida-ida, tuir sistema justisa formal no opsaun sira ba justisa tradisionál.

Treinamentu ne'e, partisipa husi profesora 1, estudante feto ema nain 17 no estudante mane ema 12, hamutuk partisipante nain 30.

“JSMP kontinua habelar informasaun legál ba eskola tanba dala barak estudante sira sai vitima ba hahalok violénsia no laiha koñesimentu kona-ba oinsa atu prosesa sira nia kazu ba sistema justisa formal. Treinamentu ne'e ho espetativa atu hasae estudante sira-nia koñesimentu kona-ba tipu krime no opsaun prosesu tuir krime nia natureza,” dehan Diretór JSMP, Luis de Oliveria Sampaio.

Iha abertura ba treinamentu ne'e, Diretór Eskola Sekundariu St. Antonio, Pe. Hipolito da Costa haktuir katak eskola prontu kolabora ho organizasaun sira, iha parte hasae kapasidade estudante nian. Aliende ne'e, diretór eskola mos agradese ba prezensa JSMP, hosi fahe informasaun legál ba estudante sira. Tanba formasaun adisional estra-kurikuler ne'e bele hasae estudante sira ninia koñesimentu kona-ba violénsia sira ne'ebé mak afeita ba feto no sira nia direitu tuir lei aplikável sira.

Iha enseramentu Vice Diretór Eskola St. Antonio, Sr. Afonso Carceles haktuir katak lori eskola St. Antonio nia naran hato'o agradese ba JSMP tanba hili eskola ne'e hodi fahe informasaun. Vice Diretor ne'e mós kontinua konfirma katak sira nia eskola prontu kolabora ho kualker organizasaun atu dezenvolve estudante sira-nia koñesimentu.

Iha trenamentu ne'e partisipantes sira hatudu antusiasmu no hatudu sira nia interese atu hatene klean liu kona-ba prosesu justisa formal.

Tuir planu treinamentu hanesan sei realiza iha 12 Janeiru 2015 iha munisipiu Aileu ho Bobonaro.

Atividade treinamentu ne'e hetan suporta husi Embassada Canada iha Jakarta-Indonezia.

Atu hetan tan informasaun kompletu favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone:3323883 | 77295795

Website: [www.jsmp.tl](http://www.jsmp.tl)

Face book: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPTl